



KEMENTERIAN WILAYAH PERSEKUTUAN

Aras G-7, Blok 2, Menara Seri Wilayah, Presint 2, 62100 Putrajaya

Tel: 03-8889 7888 Faks: 03-8889 7957

Laman web: www.kwp.gov.my

KENYATAAN MEDIA

BAITI JANNATI @ WILAYAH PERSEKUTUAN KEMBALI MEMBANTU RAKYAT MISKIN DI PPR/PA DBKL

KUALA LUMPUR, 1 Julai 2020 – Sesi turun padang ke PPR Kampung Muhibah menyantuni warga miskin membolehkan saya menyerahkan surat pemakluman menyatakan bahawa mereka terpilih sebagai penerima program Baiti Jannati @ Wilayah Persekutuan bagi tahun 2020.

Program Baiti Jannati @ Wilayah Persekutuan yang merupakan kerjasama strategik dengan Dewan Bandaraya Kuala Lumpur (DBKL), Yayasan Wilayah Persekutuan dan Tenaga Nasional Berhad (TNB) adalah untuk membantu penyewa miskin tegar yang tinggal di Projek Perumahan Rakyat (PPR) dan Perumahan Awam DBKL (PA DBKL) untuk memiliki rumah sendiri. Program Baiti Jannati @ Wilayah Persekutuan membolehkan golongan miskin memiliki unit kediaman sendiri yang lebih selesa dan kondusif tanpa perlu lagi membayar sewa bulanan kepada DBKL.

Pada tahun ini, TNB telah memberikan peruntukan sebanyak RM2 juta wang zakat untuk dimanfaatkan kepada golongan miskin tegar menerusi program Baiti Jannati @ Wilayah Persekutuan. Kementerian Wilayah Persekutuan menyasarkan 50 unit kediaman untuk diserahkan kepada individu miskin tegar yang layak bagi tahun 2020 dengan menggunakan wang zakat TNB tersebut. Kementerian juga turut menyasarkan untuk menyerahkan 10 unit kediaman kepada penyewa PPR/PA DBKL miskin tegar yang bukan beragama Islam di bawah inisiatif Tanggungjawab Sosial Korporat (CSR) TNB.

Puan Siti Zainah binti Mohd Zain yang berusia 44 tahun merupakan seorang ibu tunggal dan asnaf yang mempunyai tanggungan 5 orang anak serta pesakit kronik kencing manis adalah merupakan penerima Baiti Jannati @ Wilayah Persekutuan pada hari ini. Beliau yang hanya bekerja sebagai pembantu rumah dengan pendapatan bulanan RM500 sekaligus dapat mengurangkan kos sara hidup tanpa perlu membayar sewa bulanan PPR tersebut lagi.

Pihak kerajaan melalui KWP sentiasa berusaha untuk memastikan kesejahteraan sosial dan keselesaan kehidupan rakyat sentiasa diutamakan dari semasa ke semasa sebagai salah satu obligasi sosial kepada warga Wilayah Persekutuan. Program ini diharap dapat membantu golongan miskin tegar dan meningkatkan kualiti hidup golongan miskin untuk memiliki rumah kediaman yang selesa di Wilayah Persekutuan.

TAN SRI TPr HJ ANNUAR MUSA

Menteri Wilayah Persekutuan

1 Julai 2020